

Penubuhan Kolej Komuniti Baling: Kesan Kepada Sosioekonomi Penduduk Tempatan

Hidayani J.

*Fakulti Sains Bumi, Kampus Jeli, Beg Berkunci No. 100, Universiti Malaysia Kelantan,
17600 Jeli, Kelantan, Malaysia.*

Corresponding author. E-mail address: hidayani@umk.edu.my

ABSTRAK

Penubuhan Kolej Komuniti di daerah Baling, Kedah merupakan salah satu langkah positif ke arah meningkatkan taraf ekonomi dan kemahiran penduduk tempatan. Pembangunan Kolej Komuniti Baling telah merubah kawasan yang dahulunya dipenuhi dengan pokok getah kepada kenaikan bangunan-bangunan kedai, pasar raya dan stesen minyak. Penambahbaikan jalan raya turut memberi kesan positif terutamanya kepada penduduk yang tinggal di kawasan pedalaman. Selain daripada itu, penubuhan kolej komuniti tersebut memberi peluang kepada penduduk tempatan untuk meningkatkan lagi kemahiran dalam pelbagai bidang contohnya pertukangan, kejuruteraan, perhotelan dan lain-lain. Kolej Komuniti Baling dengan kerjasama Kerajaan Pusat juga mengadakan pelbagai aktiviti yang melibatkan pelbagai golongan terutamanya ibu tunggal dengan menganjurkan bengkel masakan, jahitan dan sulaman bagi meningkatkan lagi pendapatan mereka. Kepesatan di kawasan tersebut juga dapat dilihat dengan penubuhan Sekolah Menengah Agama Baling, Pejabat Pendidikan Daerah Baling dan Kompleks Rakan Muda. Penubuhan Kolej Komuniti Baling telah mengubah taraf ekonomi penduduk tempatan dimana majoritinya dahulu merupakan penoreh getah kepada usahawan peniagaan kecil-kecilan. Penduduk menyambut baik penubuhan kolej tersebut kerana mampu meningkatkan taraf sosioekonomi dan kemahiran bukan sahaja kepada orang luar malahan kepada penduduk tempatan.

Kata kunci: Kolej Komuniti Baling, sosioekonomi, penduduk tempatan

PENGENALAN

Baling merupakan daerah yang kedua terbesar dalam negeri Kedah. Hampir 66,539 hektar daripada **270,495.48 hektar tanah di negeri Kedah** di kawasan Baling masih dilitupi hutan. Walau bagaimanpun, kepesatan pembangunan mula dirasai oleh penduduk di daerah Baling khususnya di Pekan Baling. Sebagai kawasan yang sedang dalam pembangunan, sudah tentu ianya menjadi pemangkin pembangunan kepada kawasan sekitarnya khususnya orang Melayu dan Bumiputra terutamanya yang tinggal di kawasan pedalaman. Penubuhan Kolej Komuniti Baling ini bukan hanya memacu kepada taraf pendidikan malahan memberi impak yang besar dalam pertumbuhan ekonomi dan bilangan penduduk pada masa akan datang.

Antara faktor yang turut menyumbang kepada perkembangan ekonomi yang memberangsangkan di Pekan Baling adalah dengan kewujudan Kolej Komuniti Baling

disamping pembangunan Kolej Insaniah yang terletak 30 kilometer dari Pekan Baling dan UiTM Baling yang bakal dibina dalam masa terdekat. Kewujudan kolej ini memberi petunjuk kepada pertambahan penduduk yang bermigrasi ke Pekan Baling sekaligus mempamerkan kekuuhan ekonomi di pekan kecil ini. Telah diketahui bahawa sektor pendidikan merupakan satu elemen yang dapat merangsang pembangunan kawasan sekitar.

Penubuhan kolej komuniti bermula selepas Jawatankuasa Kabinet bersetuju dengan penubuhannya pada tahun 2000. Kepesatan dan sambutan yang menggalakkan dalam pendidikan menunjukkan statistik tahun 2011 sebanyak 72 buah kolej komuniti telah ditubuhkan diseluruh Malaysia. Kolej Komuniti Baling telah ditubuhkan pada tahun 2006. Dahulunya kolej tersebut dikenali sebagai Kolej Komuniti Sungai Petani cawangan Baling dan beroperasi di Pusat Latihan Keda (PUSTIKA) Sik. Pada 10 Julai 2006, Kolej Komuniti Sungai Petani cawangan Baling telah berpindah ke penempatan baru di Baling. Pada 25 Mei 2009, Kolej Komuniti Sungai Petani cawangan Baling mendapat Pusat Tanggungjawab baharu dan menjadi kolej induk daripada Kementerian Pengajian Tinggi Malaysia seterusnya dikenali sebagai Kolej Komuniti Baling Kedah. Kolej Komuniti Baling telah dibenarkan beroperasi di Pekan Baling pada 6 Julai 2010.

Penubuhan awal kolej komuniti menekankan visi utamanya menjadikannya sebagai pusat kecemerlangan pendidikan dalam bidang teknologi, perniagaan dan industri perkhidmatan serta berazam melahirkan graduan berketrampilan, berakhhlak mulia dan bertanggungjawab selari dengan falsafah pendidikan negara. Kolej komuniti melahirkan misi yang mewujudkan peluang, membangunkan potensi dan mencapai kecemerlangan untuk pelajar lepasan menengah dan komuniti setempat melalui pendidikan dan latihan. Peranan utama kolej komuniti ialah menawarkan kursus-kursus yang berkaitan dengan ekonomi di kawasan setempat seperti yang termaktub dalam memorandum Menteri Pendidikan No 398/2225/00. Selaras dengan peranan utama kolej komuniti, peningkatan sosioekonomi masyarakat tempatan perlulah di titik beratkan agar berdiri setanding dengan peningkatan dan kemajuan yang dikehendaki oleh kolej komuniti.

IMPAK KOLEJ KOMUNITI BALING KEPADA PENDUDUK TEMPATAN

Sektor pendidikan merupakan salah satu pemangkin kepada pembangunan ekonomi terutamanya di kawasan luar bandar. Ia bertujuan bagi meningkatkan taraf sosioekonomi penduduk yang kebanyakannya berkerja di sektor pertanian dan dibelenggu kemiskinan terutamanya yang tinggal di kawasan pedalaman dan jauh dari arus permodenan. Penubuhan kolej komuniti telah merubah taraf hidup penduduk tempatan dengan memberi pelbagai kemudahan seperti peluang pekerjaan, perkhidmatan, usahawan dan sebagainya.

Pelbagai peluang pekerjaan ditawarkan kepada penduduk tempatan di dalam sektor perkhidmatan seperti pensyarah, pentadbir, kerani, pemandu kenderaan, tukang bersih dan pengawal keselamatan. Bidang pekerjaan ini lebih memberi jaminan kepada institusi kekeluargaan penduduk setempat dimana perolehan gaji bulanan yang tetap kepada para pekerja berbanding sebelumnya dimana penduduk setempat melakukan pekerjaan menjurus kepada pertanian, perkebunan dan perladangan. Majoriti penduduk tempatan sebelum ini melakukan pekerjaan menoreh getah yang memperolehi pendapatan tidak menentu disebabkan harga turun naik komoditi getah dipasaran dan faktor cuaca yang kurang memberangsangkan untuk hasil tuaian. Selain daripada itu, peluang pekerjaan yang disediakan turut mengalakkkan golongan belia untuk terus tinggal dan turut memajukan taraf ekonomi kawasan setempat.

Penubuhan kolej komuniti juga telah meningkatkan kemudahan infrastruktur seperti jalan raya dan kemudahan internet tanpa wayar. Penambahbaikan jalan raya memberi impak yang besar kerana sebelum tertubuhnya kolej tersebut, keadaan jalan raya di kawasan berkenaan kurang memberangsangkan. Penduduk di kawasan pedalaman juga menerima baik kemudahan infrastruktur yang diberikan dan lebih memudahkan pergerakan mereka untuk ke bandar bagi melakukan pelbagai urusan. Kemudahan internet tanpa wayar juga membuka satu dimensi baru untuk penduduk tempatan. Kesukaran penduduk untuk berhubung dan menerokai dunia luar walaupun mempunyai kemudahan internet di rumah disebabkan faktor geografi di Baling akhirnya dapat diselesaikan dengan kemudahan internet tanpa wayar sejarah dengan konsep kerajaan mewujudkan kampung tanpa wayar.

Kewujudan taman perumahan di kawasan sekitar juga memberi impak yang besar. Penubuhan Kolej Komuniti Baling juga merupakan pemangkin kepada tertubuhnya pasaraya, rumah-rumah kedai, kompleks sukan, pejabat-pejabat kerajaan dan swasta. Penubuhan tersebut meningkatkan bilangan penduduk disamping penghijrahan masyarakat luar ke Pekan Baling yang mencari peluang pekerjaan di kawasan sekitar. Oleh sebab itu, perumahan di kawasan sekitar Kolej Komuniti Baling turut rancak berkembang selaras dengan jumlah peningkatan penduduk di kawasan sekitar.

KOLEJ KOMUNITI DAN SOSIOEKONOMI PENDUDUK TEMPATAN

Taraf ekonomi penduduk setempat mula berubah menjadi lebih baik berikutan kesan penubuhan Kolej Komuniti Baling. Pelbagai inisiatif dilakukan oleh kerajaan dan penduduk tempatan bagi meningkatkan taraf ekonomi penduduk di situ. Antaranya, pembinaan rumah-rumah kedai yang kebanyakannya disewa atau dibeli oleh penduduk tempatan. Berikutan kepesatan di kawasan tersebut, kebanyakkan peniaga mengakui pelaburan yang dilakukan di kawasan tersebut tidak merugikan terutamanya ketika kemasukan pelajar baru atau semester dijalankan. Peniaga juga tidak hanya bergantung sepenuhnya kepada para pelajar Kolej Komuniti Baling sebaliknya penduduk-penduduk yang tinggal dan berkerja di kawasan berkenaan.

Antara faktor lain yang menyumbang kepada peningkatan ekonomi penduduk ialah melalui rumah dan bilik sewa. Permintaan rumah sewa yang semakin meningkat sama ada pelajar kolej komuniti dan pekerja-pekerja di kawasan berhampiran menyebabkan penduduk tempatan mengambil inisiatif meningkatkan ekonomi mereka dengan menjalankan perniagaan rumah sewa. Perlaksanaan program homestay telah menjanakan sumber pendapatan kepada penduduk setempat. Kebanyakkan penduduk setempat lebih gemar mengusahakan homestay berbanding mendirikan hotel-hotel di kawasan berdekatan kolej komuniti. Pemandangan dan suasana yang aman menyebabkan homestay menjadi pilihan masyarakat luar terutamanya kepada keluarga pelajar yang mendaftar di Kolej Komuniti Baling.

Perkembangan ekonomi yang baik di satu-satu kawasan pasti akan menyebabkan hasil peningkatan pendapatan penduduknya. Berdasarkan kepada bancian yang dijalankan ke atas penduduk tempatan dalam Jadual 1, kadar pemilikan harta dan kenderaan bermotor telah meningkat pada tahun >2010 berbanding 2000-2009. Peratusan yang meningkat menjadi indikator kepada pertambahan sosioekonomi penduduk tempatan. Isi rumah yang mempunyai status sosioekonomi yang tinggi lazimnya juga cenderung memiliki lebih banyak barang kelengkapan rumah tangga.

Jadual 1: Peratusan perubahan kemampuan pemilikan harta dan kenderaan penduduk tempatan

| Jenis Pemilikan | | Tahun | |
|-----------------|--------------------|---------------|-----------|
| | | 2000-2009 (%) | >2010 (%) |
| Harta | Rumah | 78.0 | 86.0 |
| | Rumah untuk disewa | 1.5 | 3.0 |
| | Lot kedai | 1.0 | 2.0 |
| | Tanah pertanian | 19.0 | 23.0 |
| | Simpanan | 34.2 | 46.8 |
| Kenderaan | Kereta | 82.3 | 97.6 |
| | Motosikal | 90.1 | 100 |
| | Basikal | 41.6 | 83.4 |
| | Lori | 13.8 | 24.5 |
| | Van | 1.0 | 3.0 |

Perkembangan ekonomi yang baik di satu-satu kawasan pasti akan menyebabkan hasil peningkatan pendapatan penduduknya. Berdasarkan kepada bancian yang dijalankan dalam Jadual 1, kadar pemilikan harta dan kenderaan bermotor telah meningkat pada tahun >2010 berbanding 2000-2009. Peratusan yang meningkat menjadi indikator kepada pertambahan sosioekonomi penduduk tempatan. Isi rumah yang mempunyai status sosioekonomi yang tinggi lazimnya juga cenderung memiliki lebih banyak barang kelengkapan rumahtangga.

Dari segi pemilikan rumah, peningkatan sebanyak 8% dapat dilihat dan membuktikan penduduk tempatan mampu memiliki rumah sendiri berbanding tahun sebelumnya. Peratusan rumah untuk disewa turut meningkat kepada 1.5% hasil peningkatan penduduk yang berhijrah dan berkerja di sekitar kawasan kolej komuniti. Peningkatan peratusan tanah pertanian sebanyak 4% membuktikan penduduk tempatan mampu untuk memiliki tanah sendiri berbanding sebelumnya, kebanyakannya penduduk tempatan hanya menyewa tanah untuk bercucuk tanam. Dari segi simpanan wang pula, bukan semua penduduk tempatan mampu untuk menabung. Namun, peratusan penduduk tempatan yang mempunyai simpanan bertambah pada tahun >2010 walaupun kuasa membeli penduduk semakin tinggi kini.

Dari segi pemilikan kenderaan, peningkatan yang amat memberangsangkan dapat dilihat. Kadar pemilikan kereta bertambah sebanyak 15.3% manakala motosikal melonjak kepada 100%. Semua rumah memiliki sekurang-kurangnya lebih dari 1 buah motosikal. Kajian ini telah membuktikan bahawa peningkatan mampu milik penduduk tempatan ke atas kenderaan adalah tinggi dan ini membuktikan taraf ekonomi penduduk tempatan berada dalam aras yang baik.

Kolej komuniti dianggap sebagai institusi yang berpotensi membangunkan masyarakat dalam menjurus kepada keusahawanan. Antara inisiatif yang dilakukan untuk menaikkan taraf

ekonomi dan kemahiran penduduk tempatan ialah dengan penubuhan Pusat Usahawan Kolej Komuniti (PUSKOM). PUSKOM bertindak sebagai badan yang mengawal perancangan serta perlaksanaan program keusahawanan yang menyeluruh di kolej komuniti ke arah melahirkan usahawan-teknologi yang lestari dan menggalakkan budaya keusahawanan dalam kalangan staf dan pelajar kolej komuniti serta masyarakat setempat. Pelbagai program diadakan di semua kolej komuniti yang dianjurkan oleh PUSKOM bagi pembangunan keusahawanan dan tidak terkecuali dengan pembabitan Kolej Komuniti Baling. Program yang dianjurkan ini menarik minat penduduk setempat untuk mempelajari kemahiran-kemahiran yang disediakan dan dapat mengaplikasikan kemahiran tersebut sebagai sumber pendapatan mereka. Jadual 2 menyenaraikan antara aktiviti yang dianjurkan oleh PUSKOM untuk masyarakat setempat.

Jadual 2: Aktiviti keusahawanan Kolej Komuniti Baling

| Bil. | Aktiviti | Keterangan Ringkas Aktiviti |
|------|---|--|
| 1 | Kursus Penghasilan Muffin, Kek Cawan & Dekorasi | Kursus ini terbuka kepada komuniti setempat. Peserta diberi pendedahan mengenai keusahawanan, teknik pengiraan kos seunit dan strategi pemasaran penghasilan muffin dan kek cawan. |
| 2 | Kursus Pemprosesan Mee kuning & Kue teow | Kursus ini terbuka kepada komuniti setempat. Peserta diberi pendedahan mengenai keusahawanan, teknik pengiraan kos sebungkus dan strategi pemasaran . Peserta juga diberi pendedahan mengenali bahan mentah yang tidak boleh digunakan seperti asid borik. |
| 3 | Kursus Hidangan Gerai | Kursus ini terbuka kepada komuniti setempat. Peserta diberi pendedahan mengenai keusahawanan, teknik masakan menggunakan <i>sizzling plate claypot</i> dengan mudah dan cepat serta pengiraan kos sesuatu produk. |
| 4 | Kursus Jahitan | Kursus ini terbuka kepada komuniti setempat. Peserta diberi pendedahan mengenai keusahawanan, teknik pengiraan kos seunit dan strategi pemasaran jahitan. |

PENUTUP

Penubuhan Kolej Komuniti Baling dilihat sebagai pemangkin dalam meningkatkan taraf sosioekonomi penduduk tempatan. Arus pembangunan yang pesat melanda kawasan ini dan merubah wajah baru pekan ini. Kawasan-kawasan yang dahuluinya dilitupi hutan dan pokok getah suatu masa dulu kini bertukar wajah menjadi kawasan pengajian, perumahan dan pusat perniagaan yang mengalami transformasi pembangunan ekonomi yang pesat. Perubahan ekonomi kesan daripada pembangunan Kolej Komuniti Baling telah banyak mengubah fungsi bagi pekan kecil ini menjadi lebih moden.

Perubahan sosiekonomi penduduk di Pekan Baling telah meningkat dari segi pendapatan, struktur pekerjaan, taraf dan gaya hidup masyarakat setempat. Dengan asas ekonomi yang dahulunya adalah sektor pertanian telah berubah kepada sektor pendidikan, perkhidmatan dan perniagaan yang menyumbang kepada perubahan yang positif. Transformasi yang berlaku memberi kesan yang jitu kepada penduduk setempat. Perubahan dari segi ekonomi telah menyebabkan pekan yang dahulunya dianggap tiada peluang pekerjaan menjadi lubuk penawaran peluang pekerjaan. Malahan, impak sosioekonomi seperti yang dilihat dari segi peningkatan pendapatan serta pemilikan hartanah dan kenderaan memang tidak dapat dipersoalkan lagi.

Walau bagaimanapun, dalam meniti kemajuan di pekan kecil ini, terdapat beberapa impak dari transformasi pembangunan yang perlu diambil kira. Perubahan guna tanah untuk memenuhi tuntutan pembangunan secara tidak langsung turut menyumbang kepada berlakunya bencana alam. Walaupun pencemaran udara dan air di Pekan Baling masih boleh dikawal, namun pemantauan yang rapi harus dilakukan agar keupayaan Pekan Baling dapat menerima pembangunan yang seimbang.

RUJUKAN

Sarimah C. H. Potensi Kolej Komuniti Sebagai Wadah Pembentukan ‘Majikan’ Lestari. PROSIDING PERKEM VIII, JILID 2 (2013) 880-887.

Nurasyikin N. Transformasi Pembangunan Luar Bandar:Kesan Ke Atas Kesejahteraan Hidup Masyarakat. Persidangan Geografi Alam Sekitar.

Johan A. I. Penubuhan Geotaman Langkawi: Kesan Kepada Industri Pelancongan Langkawi. Perancangan dan Pembangunan Resort.

Hasnah A. Keperluan, Kepentingan dan Sumbangan Perancangan Pendidikan Dalam Pembangunan Ekonomi Malaysia. Journal e-bangi, Volume 4(2009) 13-29.

Johan A. I. Program Homestay Pemangkin Pertumbuhan Ekonomi Luar Bandar, Kajian Kes: Negeri-Negeri Utara Semenanjung Malaysia. PROSIDING PERKEM IV, JILID 2 (2009) 227-242.